

冇把握完成演出着歌迷退錢

# 張學友聲帶出事 個唱半路嗌中止



■學友近年四周巡迴演出。資料圖片



■學友載歌載舞。資料圖片

歌神張學友的《張學友 60+ 巡迴演唱會》東莞站原本於今年6月6日至8日，在廣東東莞銀行籃球中心舉行，不過最終因為有兩天與內地高考撞期，加上附近有考場，有市民投訴並希望演唱會延期，最終主辦單位宣布演唱會改為8月29日至31日舉行。演唱會前晚（31日）尾場唱到一半時，學友疑聲帶不適宣布要中止個唱，令歌迷大感意外。

學友在演出中途突然表示：「大家都見到，開始嘅時候好難控制自己啲聲，大家都知我做咗40年，要我做一個、唔好話百分之百，或者百分百掌握到自己滿意嘅演唱會，我係過唔到自己個關。今次我揀嘅歌並唔係容易唱，但冇把握可以完成今晚嘅演出，我知對我所有老師、20多位 Dancers 唔公平，我覺得非常抱歉，我要喺呢度中止個演唱會！」

對於突如其來的消息，全場觀眾驚嚇地發出叫聲，學友續說：「我好憎自己去取消演唱會嘅，好憎，何況喺東莞呢度，今日係第二次……上一次唔關我事嘍！我都想唱，不過就冇得唱，今次都想唱但唱唔到……」此時歌迷不停大叫「加油！」「很棒！」來安慰學友，

他續說：「我都唔知點收科，我應唔應該繼續做落去呢？」

## 頂硬上撐到完場

歌迷叫他繼續唱下去，最後學友決定頂硬上，唱得幾多得幾多，「如果我真係唱唔到咪唱唔到囉，咁樣得唔得先？主辦O唔OK？」歌迷再高呼：「你想唱我們都聽！」學友於是說會繼續盡能力唱，若唱不到就請大家退錢。

學友直言若令團隊的努力白費會很難過，希望到場每一位都好好保重身體，下次開演唱會再見到大家，說罷就請歌迷陪自己大合唱《你最珍貴》，最終演唱會也順利撐到完場，歌迷事後也在小紅書等發文，叮囑學友好好休息。

## 唐詩詠忙完舞台劇上山又電

視后唐詩詠(Natalie)在2022年宣布離巢，與TVB結束20年賓主關係，回復自由身的她仍工作多多，早前更首度挑戰舞台劇，表演亮眼大獲好評！熱愛跑步與登山的她，近日趁天氣晴朗，選擇上山「又電」，活動一下身體之餘，也順便曬太陽補充維他命D。她在社交平台分享登山心情，「唔打

風、好大風、唔打風，拿拿臨，上山走一轉，唔算好曬，又有啲風，好正」，字裏行間滿是享受戶外時光的愜意。

唐詩詠去年10月在銅鑼灣開設的日式吐司專門店亦人氣爆棚，吸引大批顧客排隊幫襯，近日麵包店更在中環開設分店，實行逆市擴張。



□唐詩詠完成舞台劇，要好好休息。lg圖片



■劉穎璇對愛犬錫到爛。

lg圖片

## 劉穎璇同松鼠狗鬥萌

圈中不少藝人都是愛狗一族，日前劉穎璇、關楓馨及父親關禮傑等不約而同在社交網大晒和愛犬的溫馨蜜照，見眾人攬住狗狗都一臉幸福。其中單身的劉穎璇在社交網分享多張與寶貝愛犬「lily」的合照，錫到松鼠狗爛的她留言：「我的小寶貝莉莉，你太可愛~你怎麼能這麼萌呢？」

至於關楓馨和關禮傑則父女裝上陣齊派心心，而身上的T恤全是狗狗的熨畫，她在社交網寫道：「件衫上面係我哋屋企嘅狗狗嚟嘍！」網民留言大讚兩父女好有愛，點名讚關禮傑可於幾秒內轉換多個趣味表情，展現多才一面。

## 袁偉豪開騷拖大肚寶兒獻唱

藝人袁偉豪(Ben)繼早前在廣州開了首場《路途上的袁偉豪 BEN ON THE ROAD》巡唱首站後，日前於潮州舉行第二場音樂會，今次除了有太太張寶兒及好友胡定欣到場支持外，之前Ben預告會有神秘嘉賓助陣，原來正是曾跟他合作拍攝劇集《鐵探》的姜皓文(黑仔)，黑仔更與Ben合唱了一曲《沉默是金》。

而拿着結他 Rock 爆全場的 Ben，令不少觀眾甚有驚喜，而他亦相當享受整個音樂會的過程，好友胡定欣亦有拍片放上社交網，片中見到 Ben 拖着懷孕的太太寶兒獻唱，大晒幸福。



■袁偉豪 Rock 爆全場。lg圖片